

111 年全國語文競賽原住民族語朗讀 【郡群布農語】 國中學生組 編號 1 號

masamu mapataz mas haipis

taskun a Anuu mas tama kusian huma, usaduan a Anuu mas itanangaus
tu dakus hai aizaan mas hazam. maza ngulus anis bantas hai madanghas,
haitu matahdung a isaicia lutbu. paha kamingmiing a saia tu nakudiip
makupacingku mapanah.

“namapikuas!” cisha aiza a sing’av maszang mas cipciah tu busul tu
nataibulah mas ituAnuu tutangia, at makataihcingun a isaicia tangia, paha
panlungu a Anuu at sadu mas tama tu mikuabin i?

Haungunun a Anuu mas tamacia tu, mazavaas namapanah mas
haipiscia i? antalam a Anuu tu, mavia’ik tu nii tu mahtu mapanah mas
haipiscia i? matusuhdung a tama tuhu mas Anuucia tu, nii tu kaazsu nii tu
mahtu mapanah mas haipis. Masamu amin a Bunun mapanah mas haipistan,
aupa tumananuun a haipisan tu hazamsial.

Kata mais pismaduh, pis-acipul anis masuaz mas vaivivaivi tu
sinsusuaz hai, supah a ivutaz kudiip namaun mas imita tu sinsusuaz, supah a
hahapis kudiip namapinkulaaz mas sinsusuaz, haitu katsian huma a haipisan,
mamaun mas ivutaz, mindangaz mas mita, saipuk mas sinsusuaz, paha
makuang mais mapataz mas haipistan.

Haipisan amin hai ituDihain sinkalun tu namapibauszang mas dalahcin
tu mininghumis. mais minaun a naia mas vaivivaivi tu iktuus siin supah tu

auksa, at utakiun naicia maisinin sian duma tu dalah, mintalukai a iktuusan
anis auksaan, mahtu a sain tupaun tu mindangaz mas mita masuaz. paha asa
a kata tu mapisial mas haipistan.

Aizaang tasa hansiap, asata Bunun tu malhahaiap mas saitan tu
pailungkaduan. masa habasdaingazang tu laning’avan a dalahan, cis’uni tu
macinvavaa amin a bunun tungkadang sian ludun, haitu uka tu tacini
minadas mas patus at uka sapuz. haitu haipistan mindangaz mas imita
Bunun tu mailintangus kudiip kilim mas sapuz at adasun saicia a sapuzan
isaiv mas mastatala tu Bunun. isian ma’adas sapuz tu daan hai, misdanghas
a isaicia ngulus, misdanghas amin a isaicia bantas, musasu tu mistahdung a
isaicia manauaz huspil, paha atukalakinun i, kislausan a buthul at misnuas a
maimasling sing-av.

Unnung’unung a tama tu: maupacia a haipis mindangaz mas mita tu
Bunun, masaiv mas sapuz, mahtu tupaun tu saicia a mapital-ia mas Bunun,
asa katan tu haiap masaumbaas.

Masa utazaan a Anuu mas itutama sintudadauk tu haling hai,
cinsuhdung amin unung’unung tu: nanii’inik matushung mas haipis.

111 年全國語文競賽原住民族語朗讀 【郡群布農語】 國中學生組 編號 1 號

不能射殺 haipis 鳥

Anuu 跟父親去耕地，看到前面樟樹有鳥的影子，就拿著彈弓準備去射。

「你要幹什麼！」一種類似槍爆聲如貫穿耳膜。於是他停下賴，疑惑的看著父親。

父親生氣說：「你為什麼要去射 haipis 鳥呢？」Anuu 回答說：

「我為什麼不能？」父親低著頭說：「不是只有你不能射殺 haipis

鳥，整個布農族都忌諱射殺。」

我們種小米、種玉米等作物，會有很多蟲吃壞作物。haipis 鳥會幫我們抓蟲、照顧農作物，所以，禁止射殺 haipis 鳥。

haipis 鳥也是上天派的使者，要讓大地欣欣向榮。當 haipis 吃了植物的種子，到別的地方排出來，這些種子發芽了，也幫大地播種，對大地有益，所以要好好對待。

我們布農族一定要知道這段歷史。以前洪水時期，大家急著逃難，沒有帶火種，無法生火。是 haipis 帶來火種而燒紅了嘴與腳、燒黑了羽毛、燒壞了喉嚨，喪失美妙的歌喉。

父親小聲且自言自語，haipis 鳥幫人類很大，帶了火種，是牠讓布農族強盛，我們應該回饋。

聽到父親口述，Anuu 低著頭想，不會再欺負 haipis 鳥了。